

27. januar 2015

UPA 2015/19

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

**Raajanut qaleralinnullu licensit killeqanngitsumik piffissalerlugit pigineqartarnerisa Aalisarnej pillugu inatsisartut inatsisaat nr. 18, 31. oktober 1996-imeersoq-mi § 14 atorlugu, ukiunik tallimanik sioqqutsisumik ilimasaaruteqarnikkut killilerneqartalersinnaanerat aningaasaqarnikkullu kinguneqaatissat ilanngullugit - Naalakkersuisut UKA2015-imi saqqummiussassamik misissueqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Nikolaj Jeremiassen, Siumut)

#### **Tunngavilersuut:**

Siunnersuutip tunngavigaa, raajartassat qaleralittassallu sapinngisamik tamanut iluaqutaanissaat. Ullumikkut raajartassat qaleralittassallu inunnit ataasiakkaanit selskabiniillu ataasiakkaanit pigineqarput, taakkualu pisassat akeqanngitsumik tunniunneqarnikuugaluartut ilaatigut raajarniarunnaarsimasut qaleralinniarunnaarsimasullu tunisarpaat, taamaalillutillu pisassiissutit aningaasarsiutigalugit. Maanna aalisarnermut inatsit atuuttoq malillugu raajartassanik qaleralittassanillu pigisaqartut pisassatik qaqugorsuarmut pigisinnaavaat, tamannalu isumaqarpunga kukkusumik aaqqissuussinerusoq.

Ullumikkut aalisartut inuusuttut aalisarnissamut pisassanik pissarsisinnaasanngillat, tassunga tunngavilersuutigineqartarluni pisassanik agguassasaqannginnera. Inuusuttut aalisartut pisassanik maannamut tunineqartanngitsut siunissami aaqqiinikkut raajarniarnissamut qaleralinniarnissamullunniit periarfissinneqartariaqarput.

Ilisimavara aalisarneq pillugu inatsit malillugu licensit naapertuuttumik sioqqutsilluni ilimasaarinikkut killilerneqartarlarsinnaasut. 1990-imi Inatsisartut immikkut ittumik taasinertigut aaliangersimavaat ukiunik tallimanik sioqqutsisumik atorunnaarsitsinissamut ilimasaarineq naapertuuttusoq. Taamaalionikkut pisassat agguateqqinneqarsinnaalissapput.

**Siunnersuutip aningaasatigut allaffissornikkullu pisortanut kinguneqaatissai:**

Misissuineq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulinermik naleqassaaq (250.000 kr. missaani).

**Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai:**

Misissuinerup kingunerissappagu licensit killeqanngitsumik pigineqartut killilimmik pigineqartalernissaat, taava naatsorsuutigineqarpoq tamanna namminersorlutik inuussutissarsiuteqartunut aningaasaqanikkut kinguneqaateqassasoq. Aningaasaqarnikkut kinguneqaatissat misissuinerup inernerani takuneqarsinnaassapput.

**Siunnersuutip innuttaasunut allaffissornikkut aningaasatigullu kinguneqaatissai:**

Soqanngilaq.